



**C**onradus natus est Rubeaci in Alsatia honestis parentibus, anno circiter 1515. Ibi cum ingenio ualeret, à pueris literis incubuit, & prima rudimenta feliciter percepit. postea uerò 1535 sese ad Heidelbergensem academiam contulit, atq; bonis artibus præclaram operam nauauit, ita ut etiam anno 1539 artium Magister crearetur. Deinde uerò animum ad Theologiæ studium conuertit, & sacrarum literarum lectionem sibi familiarem reddidit. In primis uerò Historijs delectatus ab adolescētia omnium gentium acta obseruauit, & temporū series inter se contulit. Eam diligētiam cum M. Heinricus Stollus Heydelbergensis Ecclesiastes in eo

obseruaret, eum plurimum dilexit, & 1541 secum Ratisbonam ad Theologorum colloquium adduxit. Ibi Conradus procerum mores animaduertit, & comitijs finitis Heydelbergam redijt. In eo loco per triennium unà familiariter uiximus, atq; uterq; M. Lucam Schroteysen Rubeaquensem, tum scholæ professorem, postea lureconsultum & Vuirtenbergicum in Montisbellgardeni comitatu Cancellarium (quem honoris causa nomino) præceptorem & patronum habuimus. Tandem etiam 1542 unà Basileam reuersi, ipse statim in artium professorem receptus fuit. Ibi cum per triennium Grammatica & Dialectica præcepta magna fidelitate docuisset, ad Ecclesiam S. Leonhardi Diaconus uocatus est. Eam functionem is pio animo suscepit, & ad finem uitę usque continuauit.